


Ua Maua Le Aiga Fou A Matagi

Tala na saunia e John Carr
Ata na tusia e Philip Webb



Ua Maua Le Aiga Fou A Matagi



Mataupu 1

Sa toe vaaia foi i o le mea! Na iloa atu e Matagi le tumutumu o le ulu o le mea i luga o le pa laupapa, ma na ia iloa ai ua toe sau foi le meaola uigaese e fai ona pa'u!

Na oso i luga Matagi ma tamo'e agai i le pa. Sa toso pa'ō atu ai lava ma lona filifili i ona tua i luga o le sima. Ua faatalitali nei i tua o le laau.

Na faafuaseia ona aliali mai le tino o le meaola uigaese. Sa faatalitali pea Matagi seia aapa le meaola uigaese i le pusa laupapa lea e tu i tala ane o le faitotoa o le pa. Ona oso loa lea o Matagi!



I se leo matuā ita lava, na soona ōu ai lava ma gū atu Matagi a'o oso atu i le meaola uigaese. Na toe vili vave ese le uila a le tagata i le fefe. Sa mau lelei le ua o Matagi i le filifili, ua toe toso ese atu ai nei i tua, a'o osooso i luga i ona vae pito i tua. Ona ōu ai lava lea a'o sola ese atu le tagata.



Na oso i luga, faapa'ū i lalo ma taafilifili solo, ua mānavanava tetele i le fiafia ae toe faanoanoa foi. O le taimi sili lea ona manaia o lona aso o le faafefeina o le tufameli pe a alu ane ae o lea ua uma.

E uma lava lena aso o taotooto Matagi i luga o le sima – faanoanoa ai lava i le nofo na'o ia, ua fia' ai ma lē fiafia. O tagata nei latou te nonofo faatasi e toetoe lava o aso uma e o ese ai mai le fale, ae loka ai lava ia i lona filifili ma nonoa i le pusa laupapa lea e ta'u e tagata o le fale o taifau.

O nisi taimi e tatala ese ai Matagi mai le filifili ae tuu e fetamo'ea'i solo faataamilo i totonu o le lotoā ae ia aua ne' i ōu, pe 'eli ni pu i le fanua, pe tomoe ma soli le togalaau'aina, pe faalavelave i taaloga o loo togitogi ai le polo a tamaiti, pe 'ati faapūpū a latou Frisbees.

Sa faasā ona alu Matagi i totonu o le fale. Talu mai lava ona laitiiti, e lei alu lava se isi e ave ia e faasavalivali. Ae i lena po, na suia ai mea uma.



Mataupu 2


Na te'i a'e i luga Matagi i le susulu malosi atu o se malamalama ma se leo gogolo. Na ia iloa lelei le mea lea ua tupu, ma na fefe ai. E ui lava o lea na faaigoa o ia ia Matagi, ae e lei fiafia o ia i matagi malolosi, ae o lona fili lava o faititili pāpā.

Ina ua toe feemo mai isi uila, ma le isi gapā leotele mai o le faititili na galulu uma ai lona fale, o inā na matuā fefe ai Matagi ma alu loa i le atoa.



E lei iloa e Matagi poo fea lea na tamo'e atu i ai, ae ina ua gapā le filifili ua matuā mau, na ia iloa ai o lea ua fai si mamao o lana momo'e. Na toe toso mai i tua lona ulu. Na ia faalogoina se leo o se mea na masae ma faapena ona gau atu ai i luma ma lona ulu. O lona kola pa'u ua leva ona nonoa i lona ua lea ua masae.

Na tamo'e Matagi agai i le laau e faamalumalu ai mai le toulū ifo o timu aisa.



A'o ia lei oo atu iinā, o le emo malosi mai o le uila na malama ai le pogisa, atoa ai foi ma le laau. Na pa'ū ifo se lālālaau i luga o le pa laupapa ma malepe ai.

A'o to'ulu ifo le timu aisa ma fitifiti solo e pei o loo sisiva i luga o le mutia, na oso atu Matagi i le va lea ua iai i le pa ma sola ese atu ai i lena po – ua fefe, maalili, ae ua saoloto.



Mataupu 3

O le taeao na sosoo ai, na ala ai i luga Matagi i ni leo fiafia. Na ia iloa mai i lalo o vao ia sa moe ai, ni tamaiti o loo fetaufetulia'i ma tau pue le latou polo.

Ona ua lē toe iai se filifili ma se pa e taofia maia o ia, sa tamo'e atu Matagi ma auai atu ai ma ia i le fiafia lea e fai mai. Na ia sua atu le polo i lona ulu, ona taliē lea o tamaiti ae e lei fiafia ai le tamaloa ma sa ia taumafai e faasegisegi ese Matagi.



A'o mo'emo'e ese Matagi mai le fanua, sa ia iloa atu se teineitiiti laitiiti o loo matamata ma lona tamā i le taaloga. Na ia iloa atu mata fiafia ma si 'ata'ata mafana i foliga o le teineitiiti o inā na iloa ai e Matagi e fiafia le teineitiiti lenei i taifau.

Na tū tū ai lava lea o Matagi i tafatafa o le teineitiiti seia oo ina ua ia sosogia meai ua uma ona kuka ma agai atu loa i le pito na sau ai le manogi.



Sa lē iloa tele e Matagi se mea e uiga i auala poo taavale, e lē pei o lona iloa i mea'ai, ma sa alu lona mafaufau i mea'ai a'o ia kolosia le auala.

Na ia faalogoina le fe' i o leo ae na faato' ā ia iloa lava o se taavale ina ua taatia ai i lalo. Na taavalevale ai lava lea na faato' ā tu lava ina ua palasi ifo i se alavai.

Na tū tū mālie a' e i luga ma tau 'etu' etu ese. Na faato' ā ia lagona lava le tiga ma le tafetotoi o lona vae ina ua taoto ifo i totonu o le pupuvao.



Ona tagitagi lēleoa ai lava lea o Matagi, ae na te le'i iloa ni ulu se lua ia e aumaulu atu i totonu o le pupuvao. O ulu o le teineitiiti mata alofa ma lona tamā. Sa vaaia le popole i la foliga. Na tilotilo ifo le teineitiiti i le vae o Matagi lea e manu'a ae na te le'i pa'i i ai.

"Aua e te popole," o le tala lea a le teineitiiti a'o vili e lona tamā le SPCA.



Sa nofo ai pea le teineitiiti i autafa o Matagi ina ua taunuu ane le tamaloa mai le SPCA. Na tago atu ua milimili le ua o Matagi ma faafilemu a'o togafiti e le tamaloa ma sii o ia i le veni. O le 'ata'ata faanoanoa ma le talotalo faaleuo a le teineitiiti o mea mulimuli ia na vaaia e Matagi a'o lei aveesea atu o ia e le taavale.




Mataupu 4

Ina ua mavae aso e fitu sa iai i le falema'i a le SPCA, ma le sefulu vaiaso lea sa malolo lelei ai i le fale o nisi tagata e ese le fiafia, na matuā lagona e Matagi lona malosi. Ua toe savali lelei e aunoa ma se toe tau 'etu'etu. Ua galo tiga o tui ma lona taotoga lea na fai, ae ua matuā malosi ma toe taaalo faatasi ma isi taifau o loo latou iai faatasi i lona aiga fou lea ua iai. E lei popole foi i lana kola fou lea ua toe fusi ai lona ua, auā e lei pipii ai ma se filifili e toso ai.




O aso uma sa iai lava se tagata na sau e fia matamata ia Matagi ma isi taifau. O nisi taimi e latou te aveina nisi taifau mo latou. E vaaia lava e Matagi foliga fiafia o taifau ma tagata, ma sa ia tau mānatu ai pe faamata e ono tupu lena mea ia te ia i se taimi.




I se tasi aso, a'o moe Matagi i tala ane o se faamalama telē lava, na pulapula a'e lona mata e tasi ma ia vaaia ai o loo faataupupula ane ia te ia mata fiafia e lua ia sa vaai muamua i ai.

E ui lava o lea e oomi lona isu i le faamalama, ma e lē o faanoanoa foi lana 'ata'ata, ae na iloa e Matagi o le teineitiiti tonu lava lea na lavea'ia o ia.




Sa liliu le teineitiiti i le tamaloa lea e tū i ona autafa ma fai atu i ai, "Dad, Dad. O ia lea! E mafai ona ave ma tatou? E mafai ona tatou o ma ave o ia i le tatou fale faamoleeeeeemoleeee?"

Na oso fiafia i luga Matagi i le faamalama ma taumafai e etoeto le foliga lea o loo ia vaaia atu i le isi itu o le tioata.



Mataupu 5

Sa faasolo lava ina lelei mea uma mo Matagi. I lona aiga fou lea ua iai, e telē le laufanua ma iai ma lona fale e leai ni filifili o iai. Sa iai ana polo e tuli, o ana ponaivi e tanu ma lana uo matafiafia lea la te taaalo e lē ita pe a tago 'ati ma pūpū ai lana Frisbee.



O aso ta'itasi e alu ai lava se tagata o le aiga e ave Matagi e faasavali poo ia foi e alu e faasavali se isi o le aiga. Sa ia a'oa'oina lelei le amio i luga o auala ma taavale ma tagata tufameli. O Aso Sa sa faataga ai ona alu e taaalo ma isi taifau, ma na oo foi ina faataga ona moe i totonu o le fale o le aiga.



Fautuaga e Maua ai se Taifau Fiafia

- O taifau e mafai ona avea o ni fagafao e sili ona lelei.
- E manaomia e taifau ni faamalositino. Alu e ta'ita'i e faasavali i aso ta'itasi. E lē gata i ana faamalositino, ae ia a'oa'o lelei foi e iloa ona amio lelei pe a iai isi tagata, isi taifau ma taavale.
- E mananao foi taifau e tamomoe solo e aunoa ma le taofiofia i se filifili. Ia faia lea tulaga i ni nofoaga e faataga ai ma saogalemu ai o ia. Faatali se'i oo ina lelei ona koleni lau taifau ma ua mafai ona e valaau atu i ai ma foi mai ia te oe.
- E fiafia taifau e taaalo. E koleni ai o latou mafaufau ma fiafia ai.
- A lua taalō ia faaaogā ni meataalo nai lo le faaaogā o ou lima ma ou vae. Aua e te “taalō pa'a'ā” i lau taifau. E ala ona faaaogā meataalo e faataalo ai ina ia fiafia ai lava lau taifau i taimi uma. Faatoa tuu i ai le “Frisbee” e taalō ai pe afai e te lē ita pe a tago 'ati ma pūpū ai.
- Afai e fai le lua taaloga lea e te togi ai se mea ae tamo'e lau taifau e “sue” mai, ia mautinoa lelei o loo nofo i lalo o ia ae e te lei togiina se mea. Ia e faaviivii o ia pe afai ua ia toe faafoi maia ma tuu i lalo le polo poo se isi lava mea sa e togia.

Asiasi i le kids.spcaceducation.org.nz e te iloa atili ai isi mea e uiga i le tausiga o taifau

Storm Gets a New Family

© 2016 Society for the Prevention of Cruelty to Animals Education, Auckland, New Zealand

Published by Wendy Pye Publishing Limited for SPCA Education

Text by John Carr

Illustrations by Philip Webb

This Samoan edition published 2019

ISBN: 978-1-98-857826-2

All rights reserved. No part of this publication may be reproduced or transmitted in any form or by any means, electronic or mechanical, including photocopy, recording or any information storage and retrieval system, without permission in writing from the publishers.

Distributed in New Zealand by The SPCA

3047 Great North Road, New Lynn, Auckland 0640, New Zealand